

Siunissami pisariaqartitsinerup qulakkeerneqarnissaa siunertaralugu ilisimatusarfimmi ilinniarfeqarfiup illutaatalu annertusineqarneranni aningaasaqarnikkut allaffissornikkullu kingunerisassat misissorneqarnerannik imaqartumik nassuiaasiornissamik Naalackersuisut peqquneqarnissaannik Inatsisartut aalajangiiffigisassaattut siunnersuut. Nassuiaammut atatillugu sukumiisumik misissorneqassaaq, danskit nunanilu allani aningaasaateqarfiit assigisaallu aningaasalersorneranut akuutinneqarsinnaanersut. Nassuiaat Inatsisartunut agguanneqassaaq 1. januar 2027 nallertinnagu.

(Demokraatit Inatsisartunut ilaasortaatitaannit saqqummiunneqartoq)

Aappassaaneerneqarneranut oqaaseqaat:

Qujanaq siulittaasoq.

Naleraq sinnerlugu oqaatigissavara ilinniartitaaneq pillugu oqallinneq pingaaruteqarluinnarmat nunatta kinguaattalu siunissaat eqqarsaatigalugu. Ilisimatusarfik ineriartortinneqassasoq amerlanerpaat isumaqatigaat. Tamanna Naleqqamiit akerleringilarput akerlilersornagulu.

Kisianni apeqqut pingaartitarput tassaavoq:

Sooq Nuuk pillugu oqaluuserisassat sukkasuumik ingerlasinnaappat?

Ilulissani atuarfissaq pillugu siunnersuut kivisissinnarlugu.

UPA2026 immikkoortoq 75-mi

Avannaata Kommuniiani inuusuttut periarfissaat pillugit siunnersuuteqartoqarpoq.

Tassani Naalackersuisut oqaatigaat suli misissueqqaarneq pisariaqartoq, suli paasissutissat amigaataasut aammalu kingorna kivisillugu.

Maanna ataatsimiinnermi Nuummi Ilisimatusarfik pillugu siunnersuut saqqummiunneqarpoq, aammalu amerlanerussuteqartut akuersaarat ersarippoq.

Tamanna innuttaasunut avannaani najugaqartunut qanoq nassuiarneqarsinnaava?

Avannaani inuusuttuusimaguit, ilinniagaqarusukkuit, Ilaquttatit qimallugit

atuartariaqassaatit,

Sineriammiunit Illoqarfinnut annernut atuariarsinnarluni nuulluni uniinnartarneq massakut ajornartorsiutigaarput.

Nuummi najugaqaruit ilinniarfissat amerlanerupput.

Kollegiat amerlanerupput.

Periarfissat amerlanerupput.

Avannaanili inuusuttut suli tunulliunneqarput,

Naak ilinniartuussuseq piffimmi tassani nunatsinni tamani appasinerpaagualuartoq.



Naleqqamiit isumaqarpugut nunarput tamarmi ineriartortinneqartariaqartoq.

Inuit Nuummi najugaqartut kisimik eqqarsaatiginagit.
Upernavimmiuuguit / Uummannamiuuguit,
Qaanaamiuuguit / Iluliarmiuguit
Qeqertarsuarmeeruit / Saattormiuuguit,
Imalu Kangersuatsiameeruit
Inuusuttut tamarmik siunissaqartinneqartariaqarput.

Ukiopassuarni avannaani innuttaasut akileraarutaannit aalisarnermit, aammalu piniarnermit nunatta aningaasarsiorneranut annertoorejussuarmik peqataallutillu pilersuipput, tamanna kialluunniit ineriartornermi malinnaalaarsimasup akerlilernaviangilaa.

Taamaattumik aamma ilinniartitaanikkut periarfissanik ammaassinissamut aningaasaliinerit nunatta avannaanut siammartinneqartariaqarput.
Ilisimatusarfillu pillugu nalunaarusiortoqarnissaa akerlerinngilarput.

Kisianni Naalakkersuisut aamma amerlanerussuteqartut eqqarsaatigeqqittariaqarpaat:
Sooq Nuuk ineriartortinneqassappat,
Sooq nunaqarfiit avannaanilu innuttaasut utaqqitiinnarneqassappat?

Naleraq isumaqarpoq ilinniartitaaneq qitiusoqarfimmiinnaq katersorneqassanngitsoq.
Nunatta isorartoqisup ataqatigiisumik ineriartortinneqarnissaa pisariaqarpoq.
Avannaani inuusuttut Nuummi inuusuttutulli naleqarput.

Taamaattumik naalakkersuisunut oqariartuutigissavara.
Avannaani innuttaasut periarfissaannik kinguarsaasarneq unitsinneqartariaqartoq.
Misissuisoqarsinnaavoq, kisianni aamma iliuuseqartoqartariaqarpoq.
Nunarpullu tamakkerlugu siammassissumik iliuuseqartoqarluni.

Naggataani Naleqqamiit oqaatigisariaqarput suliaq tukattumik ingerlammat, piffissaq kingullerpaaq atorlugu Naalakkersuisut allannguutissatut siunnersuuteqarlutik.

Ullua allanngortinnissaa Naleqqamiit akueriinnarusunnagu ataatsimiititaliamut utertinneqarnissaa ilalerneqarsinnaanersoq tusarusunnarpoq. Aningaasat misissueqqinnernut atornagit siunnersuut piviusunngortikkusupparput.

Qujanaq.